

# ԱՐՑԱԽԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ ՈՐՈՇՈՒՄ

30 հոկտեմբերի 2020 թ.

N 568-Ն

ք. Ստեփանակերտ

## ԱՐՑԱԽԻ ՀԱՆՐԱՊԵՏՈՒԹՅԱՆ ԿՈՂՄԻՑ ԱՐԺԵԿՏՐՈՆԱՅԻՆ ՊԱՐՏԱՏՈՄՍԵՐԻ ԹՈՂԱՐԿՄԱՆ, ՏԵՂԱԲԱՇԽՄԱՆ, ՇՐՋԱՆԱՌՈՒԹՅԱՆ ԵՎ ՄԱՐՄԱՆ ԿԱՐԳԸ ՀԱՍՏԱՏԵԼՈՒ ՄԱՍԻՆ

Ղեկավարվելով Լեռնային Ղարաբաղի Հանրապետության քաղաքացիական օրենսգրքի 154-րդ հոդվածով՝ Արցախի Հանրապետության կառավարությունը **ո ղ ո շ ու մ է.**

1. Հաստատել Արցախի Հանրապետության կողմից արժեկտրոնային պարտատոմսերի թողարկման, տեղաբաշխման, շրջանառության և մարման կարգը՝ համաձայն հավելվածի:

2. Սույն որոշումն ուժի մեջ է մտնում հրապարակման պահից՝ անմիջապես:

«Հաստատում եմ»

ԱՐՑԱԽԻ ՀԱՆՐԱՊԵՏՈՒԹՅԱՆ  
ՆԱԽԱԳԱՀ

Ա. ՀԱՐՈՒԹՅՈՒՆՅԱՆ

**Կ Ա Ր Գ**  
**ԱՐՑԱԽԻ ՀԱՆՐԱՊԵՏՈՒԹՅԱՆ ԿՈՂՄԻՑ ԱՐԺԵԿՏՐՈՆԱՅԻՆ**  
**ՊԱՐՏԱՏՈՄՍԵՐԻ ԹՈՂԱՐԿՄԱՆ, ՏԵՂԱԲԱՇԽՄԱՆ, ՇՐՋԱՆԱՌՈՒԹՅԱՆ ԵՎ**  
**ՄԱՐՄԱՆ**

**Գ Լ ՈՒ Խ 1**  
**ԸՆԴՀԱՆՈՒՐ ԴՐՈՒՅԹՆԵՐ**

1. Սույն կարգը սահմանում է Արցախի Հանրապետության (այսուհետ նաև՝ Թողարկող) կողմից արժեկտրոնային պարտատոմսերի (այսուհետ նաև՝ պարտատոմսեր) թողարկման, տեղաբաշխման, մարման և շրջանառության առնչությամբ առաջացող հարաբերությունները:
2. Սույն կարգի համաձայն թողարկված և շրջանառության մեջ գտնվող պարտատոմսերի թողարկման պայմաններում փոփոխություններ չեն կարող կատարվել: Թողարկողն իրավունք ունի թողարկելու պարտատոմսեր միայն սույն կարգի համաձայն:

**Գ Լ ՈՒ Խ 2**  
**ՊԱՐՏԱՏՈՄՍԵՐԻ ԹՈՂԱՐԿՄԱՆ ԸՆԴՀԱՆՈՒՐ ՊԱՅՄԱՆՆԵՐԸ**

3. Պարտատոմսերը թողարկվում են թողարկողի կողմից՝ Արցախի Հանրապետության անունից, անվանական, ոչ փաստաթղթային ձևով և ապահովված են Արցախի Հանրապետության՝ սեփականության իրավունքով իրեն պատկանող գույքով:
4. Պարտատոմսը համարվում է թողարկված «Հայաստանի կենտրոնական դեպոզիտարիա» ԲԲԸ-ի կողմից վարվող արժեթղթերի հաշվառման և հաշվարկային միասնական համակարգում (այսուհետև նաև՝ պարտատոմսերի հաշվառման համակարգ) տվյալ պարտատոմսի վերաբերյալ համապատասխան գրառումներ կատարելուց հետո թողարկման ամսաթվին:
5. Թողարկողն ապահովում է իր կողմից թողարկված պարտատոմսերի մարումը և արժեկտրոնների վճարումը:
6. Մարման ամսաթվին պարտատոմսով ցանկացած տիպի (բացի մարումից) գործառնությունն արգելվում է:
7. Պարտատոմսերով հավաստված իրավունքների ամրագրումն իրականացվում է պարտատոմսերի հաշվառման համակարգում բացված դեպո հաշիվներում համապատասխան գրառումներ կատարելու միջոցով:

### ԳԼՈՒԽ 3

## ՊԱՐՏԱՏՈՄՍԵՐԻ ՏԵՂԱԲԱՇԽՄԱՆ ԸՆԴՀԱՆՈՒՐ ԿԱՐԳԸ ԵՎ ՊԱՅՄԱՆՆԵՐԸ

8. Պարտատոմսերը տեղաբաշխվում են Հայաստանի Հանրապետության կարգավորվող շուկայում իրականացվող աճուրդի միջոցով՝ կարգավորվող շուկայի կանոններին համապատասխան: Պարտատոմսերի տեղաբաշխումը կարող է իրականացվել նաև այդ նպատակով ընտրված տեղաբաշխողի կողմից:
9. Պարտատոմսերի թողարկման չափանիշներն ու պայմանները սահմանվում են պարտատոմսերի թողարկման մասին Արցախի Հանրապետության կառավարության համապատասխան որոշմամբ, որը պետք է սահմանի առնվազն պարտատոմսերի թողարկման ամսաթիվը, թողարկման ծավալը, մարման ամսաթիվը, արժեկտրոնի վճարման ամսաթիվը և արժեկտրոնի տարեկան եկամտաբերությունը, տեղաբաշխման աճուրդի եղանակը:
10. Պարտատոմսերի արժեկտրոնները հաշվարկվում և վճարվում են կիսամյակային պարբերականությամբ:
11. Պարտատոմսերի կենտրոնացված հաշվառումը, պարտատոմսերի սեփականատերերի ռեեստրի վարումն իրականացվում է «Հայաստանի կենտրոնական դեպոզիտարիա» ԲԲԸ կողմից (այսուհետ՝ կենտրոնական պահառու)՝ «Հայաստանի կենտրոնական դեպոզիտարիա» ԲԲԸ հետ կնքված պայմանագրի հիման վրա:
12. Թողարկողը պարտատոմսերի թողարկման ամսաթվից առաջ՝ ոչ ուշ, քան նախորդ աշխատանքային օրը, էլեկտրոնային եղանակով կենտրոնական պահառուին է փոխանցում պարտատոմսի՝ սույն կարգի 9-րդ կետով նախատեսված չափանիշները՝ համակարգում գրանցելու նպատակով:
13. Կենտրոնական պահառուն սույն կարգի 12-րդ կետով սահմանված տեղեկատվության հիման վրա պարտատոմսը համակարգում գրանցելուց հետո նույն օրը էլեկտրոնային եղանակով տեղեկացնում է թողարկողին և կարգավորվող շուկայի օպերատորին պարտատոմսի գրանցման վերաբերյալ:
14. Թողարկողը պարտատոմսերի տեղաբաշխման աճուրդի կազմակերպման նպատակով դիմում է կարգավորվող շուկայի օպերատորին՝ կարգավորվող շուկայի կանոններով սահմանված կարգով: Կարգավորվող շուկայի օպերատորը իր կանոններով սահմանված կարգով տեղեկացնում է պարտատոմսերի տեղաբաշխման աճուրդի մասնակիցներին տեղաբաշխման աճուրդի մասին:
15. Սույն կարգի 9-րդ կետով նախատեսված որոշմամբ կարող են սահմանվել տեղաբաշխման աճուրդի մասնակիցների չափանիշներ, որի դեպքում միայն այդ չափանիշներին բավարարող մասնակիցները կարող են մասնակցել տեղաբաշխման աճուրդին:
16. Սույն կարգի 15-րդ կետով նախատեսված դեպքում կարգավորվող շուկայի օպերատորն ապահովում է տեղաբաշխման աճուրդի մասին տեղեկացումը և տեղաբաշխման հարթակին մասնակցությունը միայն այդ կետով նախատեսված որոշմամբ սահմանված չափանիշներին բավարարող մասնակիցների համար:

17. Պարտատոմսերի մասնակի մարումներ կամ վաղաժամկետ մարում չի նախատեսվում:

**Գ Լ ՈՒ Խ 4**  
**Պ Ա Ր Տ Ա Տ Ո Մ Ս Ե Ր Ի Գ Ն Ե Ր Ի Ե Վ Ա Ր Ժ Ե Կ Տ Ր Ո Ն Ն Ե Ր Ի Հ Ա Շ Վ Ա Ր Կ Ի**  
**Ի Ր Ա Կ Ա Ն Ա Ց ՈՒ Մ Ը**

18. Արժեկտրոնային պարտատոմսերի գինը հաշվարկվում է՝ համաձայն հետևյալ բանաձևի՝

$$DP = CP + FV * \frac{C}{2} * \frac{A}{E},$$

որտեղ՝

$$CP = FV * \frac{C}{2} \sum_{i=1}^N \frac{1}{(1 + \frac{Y}{2})^{i-1+\tau}} + \frac{FV}{(1 + \frac{Y}{2})^{N-1+\tau}} - FV * \frac{C}{2} * \frac{A}{E}$$

$$\tau = \frac{DSC}{E}$$

- FV-ն պարտատոմսի անվանական արժեքն է,  
 DP-ն պարտատոմսի ամբողջ գինն է (ներառված կուտակված տոկոսագումարը),  
 CP-ն պարտատոմսի մաքուր գինն է (առանց կուտակված տոկոսագումարի),  
 C-ն արժեկտրոնի տարեկան եկամտաբերությունն է (%),  
 Y-ը եկամտաբերությունն է (%),  
 DSC-ն գործարքի վերջնահաշվարկի ամսաթվից մինչև առաջիկա արժեկտրոնի վճարումը մնացած փաստացի օրերի թիվն է,  
 E-ն նախորդ արժեկտրոնի վճարման ամսաթվից (իսկ առաջին արժեկտրոնի դեպքում՝ թողարկման ամսաթվից) մինչև հաջորդ արժեկտրոնի վճարման ամսաթիվը (իսկ վերջին արժեկտրոնի դեպքում՝ մարման ամսաթիվը) մնացած փաստացի օրերի թիվն է համապատասխան պայմանականության դեպքում,  
 A-ն նախորդ արժեկտրոնի վճարման օրվանից մինչև վերջնահաշվարկի ամսաթիվը փաստացի օրերի թիվն է, իսկ առաջին արժեկտրոնի փուլում գտնվելու դեպքում՝ թողարկման ամսաթվից մինչև գործարքի վերջնահաշվարկի ամսաթիվը փաստացի օրերի թիվը,  
 N-ն այդ պահին մնացած արժեկտրոնների վճարումների թիվն է:
19. Պարտատոմսերի արժեկտրոնի հաշվարկն իրականացվում է պարզ մեթոդով, որի դեպքում հավասարվում են փաստացի և հայտարարվող արժեկտրոնների չափերը՝ համաձայն հետևյալ կանոնի՝

$$A = FV * \frac{C}{2},$$

որտեղ՝

A-ն արժեկտրոնի վճարվելիք գումարն է տասը Հայաստանի Հանրապետության լումայի ճշտությամբ՝ համաձայն թվաբանական կլորացման կանոնների,  
FV-ը պարտատոմսի անվանական արժեքն է,  
C-ն արժեկտրոնի տարեկան եկամտաբերությունն է:

## **Գ Լ ՈՒ Խ 5**

### **Պ Ա Ր Տ Ա Տ Ո Մ Ս Ե Ր Ի Մ Ա Ր Մ Ա Ն Ե Վ Ա Ր Ժ Ե Կ Տ Ր Ո Ն Ն Ե Ր Ի Վ Ճ Ա Ր Մ Ա Ն Կ Ա Ր Գ Ը**

20. Թողարկողը (կենտրոնական պահառուն, եթե այն թողարկողի հետ կնքված պայմանագրի հիման վրա իրականացնում է պարտատոմսի մարման և արժեկտրոնների վճարումը) պարտատոմսերի մարման վճարման և (կամ) արժեկտրոնի վճարման ամսաթվին՝ մինչև ժամը 12:00-ն, ապահովում է պարտատոմսի մարումն ու արժեկտրոնի վճարումը: Վճարումները կատարվում են անկանխիկ եղանակով: Կենտրոնական պահառուն սույն կետով նախատեսված գումարների վճարման փաստի մասին Հայաստանի Հանրապետության կենտրոնական բանկ է ներկայացնում տեղեկատվություն, եթե այն թողարկողի հետ կնքված պայմանագրի հիման վրա իրականացնում է պարտատոմսի մարման և արժեկտրոնների վճարումը:
21. Շրջանառությունում գտնվող պարտատոմսերը համարվում են մարված, եթե վճարվել են բոլոր արժեկտրոնները և պարտատոմսերի անվանական արժեքը:
22. Եթե պարտատոմսերի մարման և (կամ) արժեկտրոնի վճարման ամսաթիվը լրանում է այն ամսին, որը չունի համապատասխան ամսաթիվ, ապա ժամկետը լրանում է այդ ամսվա վերջին օրացուցային օրը:
23. Եթե պարտատոմսերի մարման և (կամ) արժեկտրոնի վճարման ամսաթիվը ոչ աշխատանքային օր է, ապա պարտատոմսերի մարումը և (կամ) արժեկտրոնի վճարումն իրականացվում են հաջորդ աշխատանքային օրը:
24. Պարտատոմսը մարվում է և (կամ) արժեկտրոնը վճարվում է պարտատոմսի մարման և (կամ) արժեկտրոնի վճարման ամսաթվին նախորդող օրացուցային օրվա ժամը 24:00-ի դրությամբ կենտրոնական պահառուի մոտ հաշվառվող պարտատոմսի սեփականատիրոջը և (կամ) անվանատիրոջը: Անվանատերն ապահովում է պարտատոմսերի մարումն ու արժեկտրոնի վճարումն իր մոտ հաշվառվող սեփականատիրոջը:
25. Պարտատոմսերի առաջին արժեկտրոնի վճարման հաշվարկն իրականացվում է թողարկման ամսաթվից սկսած:
26. Պարտատոմսերի արժեկտրոնի վճարումն իրականացվում է տվյալ պարտատոմսերի թողարկման ամսաթվին հաջորդող յուրաքանչյուր վեցերորդ ամսվա համապատասխան օրը՝ մինչև պարտատոմսի մարման ժամկետի լրանալը:

**Ա Ր Ց Ա Ն Ի Հ Ա Ն Ր Ա Պ Ե Տ ՈՒ Թ Յ Ա Ն Ն Ա Խ Ա Գ Ա Հ Ի Ա Շ Խ Ա Տ Ա Կ Ա Ջ Մ Ի  
Կ Ա Ռ Ա Վ Ա Ր ՈՒ Թ Յ Ա Ն Գ ՈՐ Ծ Ե Ր Ի Կ Ա Ռ Ա Վ Ա Ր Չ ՈՒ Թ Յ Ա Ն Պ Ե Տ**

**Ա. ԼԱՋԱՐՅԱՆ**